



Gout-i Golden Spike nung
otsü tasen ka yanglu

Iran-i nuclear sentong
tenzükshira ano amaktsü: Trump



Bengaluru nung NE-SPARKS sentong asoshi Nagaland team ogo

Kohima, Aami/June 25 (TYO): Indian Space Research Organization (ISRO), Bengaluru-i batch tanabuba exposure sentong ka ama Nagaland nungi kaketshir 12 den tesayur ka tanü apusoa ogo.

Iba exposure programme ya North East Programme for Awareness, Reach & Knowledge on Space (NE- SPARKS) nung shilem ka lir.

Ibai Ministry of DONER, Government of India ajanga Government of Nagaland den lungjemer ayongzük, ta Directorate of School Education, Nagaland, Kohima nungi

ketdangsür kati ashi.

Kaketshirtem ya Don Bosco Higher Secondary School, Dimapur; Pranab Vidhyapith Higher Secondary School, Dimapur; Govt. Higher Secondary School, Purana Bazar, Dimapur; Govt. Higher Secondary School, Chümoukedima; Unity Christian Higher Secondary School Chümoukedima aser North Town Higher Secondary School Chümoukedima nungi alitsü.

Iba team ya teacher guide Keneile-u Suokhrrie-i anir ao aser June 28, 2025 nü meypa shilangtsü.

Chümoukedima District Village Council's Association tentetogo

Dimapur, Aami/June 25 (TYO): Chümoukedima District kübok aliba Village Councils tem mezügbuba senden June 25, 2025 nü Chümoukedima Village Council Hall nung alidang Village Councils 56 nungi teshimtet nisung 195 dena liasü.

Iba senden nung 2015 küm tentetba Chümoukedima Area Village Chairmen Association tenüng Chümoukedima District Village Council's Association melentsü lemtet aser Chümoukedima VCC aser taoba Angami Public Organization tir Razouvotuo Chatsu ya Interim Convenor, Unity Village Council indang VCM Vika H Chishi ya Secretary shima liasü.

CDVCA indang Spokesperson asütsü Sebastian Zumvu shim aser Advisors ti - Zhato Kimho, President, Chakhroma Public Organization and VCC of Piphema A; Ghuzhi Shohe, VCC, Diphupar; Reyopoyi Nyekha, VCC, Naga United; Dejiraj Giriso, Head GB, Dhansiripar, GB Tokishe Assumi, Thilixu; Charlie Sekhose, VCC, 5th Mile Model; LK Swu, Head GB, Pimla aser Legal Advisor atema VCC Chekiye, Adv Hukavi Zhimomi shima liasü.

Nagaland sorkari Inner Line Regulation regime mapa kuma inyaktsü benokba parnoki pela agizük aser iba inyakyim nung takok angutsü asoshi Village Councils ajungai enforcing agencies den yariteptsü pangjema liasü.

Kasa mapang sorkar dang Online aser Offline hybrid mode amshitsü temelaba asüngdangtsü aser Online mode ya Guarantor asoshi temelaba kumdaktsütsü aser Agriculture labourers atema ILPs ya anogo 90 masü küm ka atema agütsüdaktsütsü asüngdangtsü lemtet.

Naga Customary laws tashi itshitsü aser tajungba nung amshitsü atema Rules for

Administration of Justice & Police in Nagaland (Fifth Amendment) Rules, 2025 indang Part 4(A) sangdongba parnoki pela agizük. Kasa mapang parnoki sorkar dang Nagaland Bar Association ajanga tawa benokba Fifth Amendment tekeraba nung asadangtsü asoshi asüngdangtsü lemtet.

District Customary Courts indang Presiding Officer aser züngsem ana shimtsü atema aser item Courts tem inyakyim indang ozüing yanglutsü aser District Customary Courts nung vacancies adokdang Dobashis nungi anisüingzüker alir aser GBs tejangja nem mezüing maongka agütsütsü asoshi asüngdangtsü lemteta liasü.

CDVCA ajanga District nung tekeraba nung VDB Secretary Association/s anentsü aser VDB Secretaries ajunga dang iba ama Association/s nungi pei sasa pilatsü renem.

District nung aliba Underground factions dang Naga hungeri One Government One Tax yimym ayimba nenshia sangdong aser Government of India dang Ceasefire Ground Rules nung shia aliba shidak mapa kuma inyaktsü aser ozüing nung aibelener tem asoshi designated Ceasefire Monitoring Office ya parnok jenokdak tesem mekumdaktsütsü asoshi Ceasefire Ground Rules repringshiang ta ashitsü pangjema liasü.

Parnoki Department of Rural Development dang VDB mapa tajungba nung inyaktsü asoshi District headquarters nung Project Officer yoktsü ayongzüka liasü, aser Department of School Education dang District Education Officer yoktsü ayongzüka liasü.

Maneni CDVCA ajanga Department of Law and Justice dang tekeraba nung District Sessions Judge indang post nung nübu shimtsü ayongzüka liasü.

Minister Paiwang-i Zunheboto district atema Mega Projects sangdong

Dimapur, Aami/June 25 (TYO): Bodhbarnü Minister, Health & Family Welfare, P. Paiwang Konyak-i District Hospital Zunheboto atema projects tulu sangdong aser nüburtem dang item projects asangsang akumtsü asoshi amalitep akatsü ayongzüka liasü.

Minister Paiwang ya Viksit Nagaland for Viksit Bharat nung shilem ka ama state tesem balala sema jajaba tang Zunheboto nung lir.

Yangji pai District Hospital Zunheboto semdangba sülen lokti balala lenirtem den senden amen aser iba mapang 'mega projects' ya sangdonga liasü.

Iba mega projects nungya tang teyangludak District Hospital Zunheboto, flat type staff quarter yanglutsüba, Urban Public Health Centre yanglutsüba, Integrated Public Health Laboratory yanglutsü, CMO building yanglutsü, nursing school amenoktsü, 30 bedded Ayush hospital, Pughoboto nung PHC tasen yanglutsü, Satoi PHC yanglutsü, Sukomi Sub Centre yanglutsü, Hebolimi Sub Centre, Hoshepu MO quarter, Satakha MO quarter aser Xukhepu staff quarter yanglutsü indang sangdong.

Tang teyangludak District Hospital tasenba kera meyangluba indang jembidang, department-i mapang atsünglangba maginer, kechiaser mapang atsülangba ajanga sen timba indokts, ta Minister Paiwang-i ashi.

Iba atema pai local MLA, civil society aser political party workers tem dang mapang shidang nung (December 2025) mapa renemtsü asoshi inyakdaktsütsü ayongzük aser iba project ya December 2025 nung tembangtsü aser mapang apuloktsüba malitsü ta nenshia ashi.



P. Paiwang Konyak

State governor aser political party tem densema state aser centre nung temaba ketdangsür ajunga den shisa agitepba sülen iba tour ya senzür, ta Minister-i metetdakttsü.

Ato Kilonser Narendra Modi indang Viksit Nagaland for Viksit Bharat mangdang lemsatepdang, 2047 tashinung India ya 'developed' sür alitsüla aser healthcare tsütsü Nagaland atsüngzüka maotsüla aser Zunheboto district nung healthcare facilities tajungba angutsü imla atar, ta ashi.

Nübu agi anüingba indang jembidang, NPSC-i nübu shimba maparen tembangba sülen iba tebilemtsü malitsü aser tang MBBS azüingertem surety bond yanglua aliba ama parnok züingzükba sülen department nung inyaktsü, ta pai ashi.

Minister-i senotsü ochishia amshitsü, CMHIS, Ayushman Bharat nung tenüng zülüoktsü, OPD mapang shidak amshitsü, licence aser pharmacies tejangja maliba pharmacy tem shibangtsü aser TB elimination campaign nung shilem agitsü ayongzüka liasü.

Department-i facilities ajunga agüjaka nüburtemi District Hospital facilities mamshira mozüki samatsü, ta Minister

Paiwang-i ashi.

Advisor, Food & Civil Supplies and LMCP, K. T Sukhalu-i minister dang pelaba lemsatepdang, tesüiba mapang minister katia team ajunga anir grassroots level sema jajaba mongudang aser minister lenisüba kübok Zunheboto nung terenlok alitsü, ta ashi.

Pai minister dang Sumi kin tenük lapoktsüba, ketdangsürtem ajungmesoba aser district kata senzüka metoktsüi Nagaland tejakleni anir aoba asoshi pelaba lemsatepa liasü.

Minister-i mega projects sangdongba atema Sukhalu-i pelaba lemsatep aser projects ajunga takok ngua inyaktsü atema akok tashi amalitep akatsü ashi.

Paisa district administration, MS aser CMO dang CMHIS aser Ayushman Health card asoshi lungjemer awareness agütsütsü ayongzüka liasü.

Paisa osetsüset alitsü atema pa indang LADF iconic projects nungi sen inokja eye OPD takdang ulushia yanglushitsü ta ashi.

Advisor Sukhalu-i Zunheboto District Hospital nung doctors aser nurses tem dang pei mapa nung bendanga agütsür inyaktsü ajungshia liasü.

Iba sentong nung Sumi Hoho aser GBs temi jembidang mozüki nung nüngdakbatem indang lemsatep aser Zunheboto district health centres renloktsü asoshi temulung agütsüba atema minister dang pelaba shia liasü.

Secretary H&FW Tainiu aser Principal Director H&FW Dr. Merenla nungeria civil societies aser local MLAs tem dang pelaba lemsatep aser Zunheboto nung district hospital tajungba kumdaktsütsü asoshi department den yariteptsü ayongzüka liasü.

Akashvani Kohima aser District Administration tsüngta MoU zülutep

Dimapur, Aami/June 25 (TYO): Nüburtem nem osangtsüsang agütsüba tajungba kumdaktsütsü asoshi Akashvani Kohima aser Kohima District Administration tsüngta June 25, 2025 nü Memorandum of Understanding (MoU) zülutepa liasü.

Sorkar inyakyim, public welfare, health, education, real-time traffic updates, disaster management aser danga tongtipang inyakyim nung rangloker radio programme aser awareness campaigns agütsütsü nükjidong nung iba mera ya agia liasü.

Iba tezüingzüktep nung shilem ka ama Akashvani Kohima-i District Administration den shisa lemsatepa radio programs tem yanglua sangdongtsü.

Kasa mapang District

Administration ajanga item sentongtem nung shilem agitsü asoshi ketdangsür, takotet nisungtem aser shisalen sayurtem agütsütsü.

MoU nungya emergency communication nung radio ajanga tongti shilem agitsü shia lir.

Disaster Management Act, 2005 indang Section 30 nung aliba ama Akashvani Kohima ajanga alimar lendong, pandemics mesüra danga ajungben rondak mapang sorkar sangdong aser advisories tem broadcast asütsü.

Party ana ya lungjemer community training aser disaster preparedness amala inyakyim ajungkettsü.

Ano linük aser state sentongtem, elections aser danga tongtipang sentongtem asoshi külemi special programs aser

jingles tem yanglutsü.

FM Tragopan ajanga Kohima yimti nung senzüsempongertem yaritsü asoshi ghonda tesadang shia real-time traffic updates agütsütsü. Iba updates ya anepdang 10:00 ako nungi anüngdang 12:00 ako tashi agütsütsü aser ano nikongdang 3:00 ako nungi 5:00 ako tashi agütsütsü.

Iba sentong yagi sorkar indang schemes aser policies tem tejangjaba agütsütsü, aser Kohima district nung nüburtemi metettsü.

Iba MoU nung Deputy Commissioner Kohima, B. Henok Buchem, NCS; Additional SP Kohima (Traffic), Z Tshurhosie Kajiri aser Assistant Director (P) and Head of Programme, Akashvani Kohima, Abino Lasuh hungeri meyongnem agüja liasü.

Mokokchung District nung advocacy sentong ka agiogo



Advocacy sentong ka June 25 nü CMO Conference Hall, Mokokchung nung agiba mapang tangokba noksa angur.

Dimapur, Aami/June 25 (TYO): Anti-Malaria Month dak sendakba nung Advocacy sentong ka June 25 nü CMO Conference Hall, Mokokchung nung agiogo. Iba sentong ya "Test, Treat, Track" omen nung ajemdaker agia liasü.

Setong nung o jembiba mapang Chief Medical Officer Mokokchung Dr. Sentizungla Marina Yaden-i ashiba agi, 2025 kum Anti-Malaria Month ya "Test, Treat, Track" omen nung ajemdaker amunger, aser iba ya WHO-i 2010 kum benokba tasa ka lir, koba tashidak diagnosis, tendangba aser anti-malarial treatment shitak agüja aser surveillance system maneni tashi ita toktsüba ajanga ajak ayimjemtsü atema nükjiding nung benoka comprehensive aser kuli dak amendaker inyakba inyakyim ka lir.

Laisa, meita aotsü aser tashidak tendangtsü koda tongtibang iba indang lemastep,

koba ajanga tashidak tamajungba kuma maodang puteta ramen atema mapang shidak nung temang anepalutsü aser iba den ramen mozü kanga tajangzük ka amshitetsü melatsü, ta ashi. Maneni lai sentong nung shilem agirtem dang "Test, Treat, Track" strategy" benoka inyaksü tali bendanga agütsüshitsü, kechiyong 2027 kum tashi nungbo India nung indigenous malaria ken o tem tazungla kümdaktsütsü aser 2030 kum tashi nungbo meshimeshia samatsütsü nükjiding lir, ta ashi.

Kasa mapang nung Dr. Martula Lemtur, DPO CD-I, Mokokchung-i, Mokokchung District nung ramen tashidak dak sendakba nung PowerPoint presentation ka agütsü. Lai vector borne tashidaktem indang, item ya koda nokdangtsü aser koda anepalutsü iba indang tangazükba agüja liasü. Laisa, ramen tashidak nokdangtsü atema district-i jenjang agibatam

indang metetdakja liasü.

Sentong nungsa Deputy Commissioner Mokokchung Ajit Kumar Verma, IAS-i o jembiba mapang, India ajunga den külemi district nung Anti-Malaria month amungtsüji kodang tongtibang iba indang lemsatap, kechiyong iba ya tashidak dak sendakba nung tangazükba agütsütsü, tashidak nokdangtsü aser ramen tashidak meshi meshia samatsütsü atema lir, ta ashi.

Paisa, district nung Vector borne tashidak balala azüoka ayutsü atema mapang shitak nung jenjang tapet agiba asoshi National Vector Borne Disease Control Program (NVBDCP) nem tenüngsang agütsü. Maneni DC-i, lokti lenirtem aser ken o dak sendaka alirtem dang ramen tashidak samatsütsü atema nükjiding aliba ataloktsü aser yakyaka shilem agitsü ajungshia liasü.

Mokokchung nung Samvidhan Hatya Diwas sentong agiogo

Dimapur, Aam/June 25 (TYO): 1975 kum India constitution chirepa timtemba lepshia metetdaktsütsü aser 1975 kum National Emergency mapang timtemertem nem tetushi agütsütsü nükjiding nung Samvidhan Hatya Diwas ya India ajunga nung June 25 nü amunger.

Iba sentong ya June 25 nü District Administration, Mokokchung aser District Culture Office, Mokokchung na longjemer DCS Conference Hall nung agiogo.

Sentong nung Associate Professor, Department of English, Fazl Ali College, Bendangsenla-i o jembiba aser lai "The Emergency of 1975: A Constitutional Turning Point" onük nung ajemdaker jembia liasü.

Sentong nungsa district administration tenüng nung Ajay Moktan IAS (P)-i o tatsüka jembiba aser Kato Aomi EAC(P)-i tepela o jembia liasü.

Iba sentong ya District Cultural Officer, Mokokchung, Imyaba Ao lenisüba nung agia liasü.

Meluri nung NBHM-i hadir balala lemstsü



Meluri nung VDVK züngsemtem nem hadir balala agütsüba noksa nung angur.

Dimapur, Aami/June 25 (TYO): Pradhan Mantri Van Dhan Yojana (PMVDY) kübok Nagaland Beekeeping & Honey Mission (NBHM)-i June 24 nü Meluri Village Council Hall nung Tools & Equipments lemstsüba sentong ka ayongzüka agiogo.

Sentong nung Advisor for N&RE and NSDMA, Z. Nyusietho Nyuthe alakteta jaoker liasü, aser pai beneficiaries tem dang parnok mapa tali nendaka inyaksü ajungshi, kechiyong ninang

metsüba ya senotsü aatsü atema lenmang tajung ka ta ashi. Paisa, Van Dhan Vikas Kendra (VDVK) cluster züngsemtem dang parnok tenüng "RAPHALUO" den putepa alitsü aser terenlok den sütepba aintsü ajungshi.

Sentong nung tetushi tejaoker Chairman NBHM, Obed Quinker-i, sentepa aliba lokti dang taküm liyonga aotsü atema arem nung anguba alirongsentem takok tashi agitsü ajungshia liasü.

Sentong nung Village

Council Chairman, Meluri, Tsrütho Pochury-i lokti pela agizükba o jembiba aser RAPHALUO VDVK mendenbuba Riepetho Nyuwi lenisüba nung iba sentong agia liasü.

Sentong nung DC Meluri, K. Mhathung Tsanglao, NCS, NBHM nungi ketdangsürtem aser VDVK züngsemtemi shilem agia liasü.

Sentong nung RAPHALUO, VDVK Cluster nungi SHG ter shi nem hadir balala lemja liasü.

Mokokchung nung tetsürtem atema financial awareness camp ka katsü

Dimapur, Aami/June 25 (TYO): Tetsürtem aser aiür chanutem nem senotsü dak sendakba nung tangazükba agütsütsü aser parnok rongsenketzüng nung tashi ita kümdaktsütsü nükjiding nung "Beti Bachao Beti Padhao" kübok Sankalp- District Hub for Empowerment of Women (DHEW), Mission Shakti aser District Administration, Mokokchung na longjemer June 24 nü Deputy Commissioner's Conference Hall Mokokchung nung Financial Awareness Camp ka ayongzüka katsüogo.

Sentong nung Mokokchung Deputy Commissioner Ajit Kumar Verma IAS-i, sentong nung shilem agirtem dang pei rongsen achaayangtsü atema jenjang tapet agitsü aser sorkar scheme aser tajangzük koba parnok ajangzükdaaktsütsü atema mejeta benokba lir, item ya takok tashi agitsü ajungshi.

Camp mapang Financial

Institutions aser sorkar department balala nungi ketdangsürtem-i, basics of banking saving & budgeting, digital financial literacy, safe online transactions, tetsürtem atema financial scheme tem, sen aputsü lenmangtem, loan aser entrepreneurship maongkatem indang tangazükba agüja liasü.

Iba sentong ya Gender Specialist DHEW Nukshinaro lenisüba nung agi, shibai tetsürtem tangar dak metaloker malitsü atema financial literacy-i tongtibang shilem agiba indang lemsatapa liasü. Laisa, tebandang makaba aser ajaki koktetba financial education koda tongtibang iba indang lemsatap. Sentong nung Specialist in Financial Literacy, DHEW Tajungienla-i tepela o jembiba aser iba mapang lai, tetsürtem aser aiür chanutem tajangzük aser terenlok asoshi DHEW bendanga agütsür aliba nenshia metetdaktsü.

Sorkar officer aser staff atema medical camp ayongzüka katsü



Nagaland Legislative Assembly Speaker Sharingain Longkumer-i Medical camp lapoktsüba noksa angur.

Dimapur, Aami/June 25 (TYO): Investment and Development Authority of Nagaland (IDAN) aser Medanta - The Medicity na longjemer June 25 nü sorkar officer aser staff tem atema IDAN Office, Capital Convention Centre, Kohima nung angati medical camp ka ayongzüka agiogo.

Iba sentong nung Nagaland Legislative Assembly Speaker Sharingain Longkumer tongti tejaoker liasü aser pai iba camp ya lapoktsü. Sentong nung o jembiba mapang Longkumer-i, Medanta hospital nungi doctor, nurse aser volunteer tem aser IDAN ketdangsürtem dang iba angati medical camp ayongzüka katsüba atema kanga pelaba lemsatap.

Paisa, Chief Minister's Health Insurance Scheme (CMHIS) ajanga Nagaland nung aliba nüburtem nem jenjang dalang agi healthcare facilities tajungtiba agütsüba indang lemsatap. Pai, iba insurance scheme takok asoshi teyari agütsüba atema state sorkar kübok officer aser staff tem dang kanga pelaba lemsatap.

Speaker-i, Vedanta Hospital mendenbuba aser Managing Director Dr. Naresh Trehan indang tetshia jembiba aser ashiba agi, mozüki nükjidingji North-East tesem nem world class medical expertise, cutting-edge technology aser comprehensive healthcare services agütsütsü atema lir, ta ashi.

Longkumer-isa, Nagaland

nung specialized care maliba indang jembiba aser state nung cancer tashidak agi timtemtepa tajemba kümdaktsütsü aser cancer indang tangazükba agütsütsü nungdakba indang lemastepa liasü.

Sentong nung Under Secretary, IDAN, I. Changsang-i lokti pela agizükba o jembiba aser iba sülen Medanta Group tatong tir Tarun Majumdar-i iba camp ayongzüka akaba nükjiding lemsatpa liasü.

Pai ashiba agi, Medanta Hospital aser IDAN na longjemba ya Nagaland nem healthcare facilities temelaba agidaktsütsü atema lir. Paisa, Chief Minister's Health Insurance Scheme agütsütsü atema Nagaland sorkar aser Medanta na tezüluba nung tenangzüktepba yanglur aliba indang metetdaktsü.

Iba sentong ya of Northeast India Strategy at Medanta, Rohan Abraham-i tepela o jembir tembanga liasü, shiba sentong nung shilem agir ajak dang kanga pelaba lemsatap.

Camp nung oncologist, cardiologist, aser general practitioners tem densema Medanta Group of Hospitals, Gurugram nungi specialists aser doctor tem team kati teyari agütsüogo. Camp mapang blood pressure asadanga, blood sugar tendanga, ECG (based on doctor's recommendation), Bone Mineral Density test, aser Pulmonary Function Test nung agia liasü.



New Delhi, June 25, 2025: Operation Sindhu kübok IAF indang tayimtsü ka ajanga Israel nungi aruba India nungertem Delhi airport nung Minister of State, Shobha Karandlaje-i agizükdang tangokba noksa nung angur.

Election Commission ya sorkar ket nung hadir ka kümogo: Kharge

New Delhi, June 25 (Agencies): Election Commission ya sorkar ket nung hadir ka kümogo, ta Bodhbarnü Congress Tir, Mallikarjun Kharge-i aitsü.

Paisa, elections nung inyakyim meshidakba tebilemtsü onüktem Congress-i benoker, ajisüaka Election Commission-i item tebilemtsü onüktem angadangtsü memelunger, ta ashi.

Kharge-i, Congress lenir Rahul Gandhi-i tatalokbatem tejangja metetdakja 2024 Maharashtra election nung ochimashi inyakyim metetdaksüogo, ajisüaka Election Commission-i ibaji magizükteter, ta ashi.

Congress indang Indira Bhawan headquarters nung osangbenertem senden ka ayongzüka jembidang Kharge-i, "EC ya sorkar ket nung hadir ka kümogo. Nenok ket nung hadir ka lir aser nai (Ato kilonser

Narendra Modi), nenoki elections nung takok angur ta jembir. Nai election nung takok angur masü saka nü machine agi takok angur," ta ashi.

State balala nung election agiba dak sendakba nung Kharge-i, "Nenoki ibaji (EC) kongi yoknüdir yoker aser nenoki kong soita yunüdir idakji soita ayur," ta ashi.

"Onoki Maharashtra nung takok angu, iba sülen ita pongu lirbo voters züngya kanga renlokogo. Küm pongu tsüngda voters' list shilem 2-3 agi teimba kümogo. Ajisüaka komaser ita pongu tsüngda shilem 8 renlok?" ta pai asüngdang.

"Ni elections 13 nung toktepogo aser election aika nung shilem agiogo, ajisüaka ni yamaibo kodanga mengudang," ta Kharge-i ashi.

Kharge-i, Congress party-i mapang shia election inyakyim meshidakba indang tebilemtsü

onüktem lemsateper, saka Election Commission-i angadangtsü memelunger, kechiyong sorkari tesem ajaklen azüoker, ta ashi.

"RSS nisungtem ajaklen yuja lir aser tangartem atemabo tesem mali. Election Commission-i onoki jembiba mangar aser onok nem voters list magütsür. Nenoki ibajia azüoker," ta Congress Tirisa metetdaksü.

Election inyakyim meshidakba tesem aika nung nüburtemi tashishiba agütsüogo, ajisüaka Election Commission-i memetongshir, ta pai ashi.

Bodhbarnü Congress-i Election Commission dang Maharashtra nung voters list indang machine-readable digital copy den külemi Maharashtra aser Haryana na nung polling anogo indang video noksa hopta ka tsüngda agüjang, ta takhangba agütsüogo.

SCO senden nung adentsü atema Rajnath Singh China-i ogo

New Delhi, June 25 (Agencies): Shanghai Cooperation Organisation (SCO) defence minister tem senden nung shilem agia adentsü atema Bodhbarnü Union defence minister Rajnath Singh Qingdao, China-i ogo.

2020 küm May ita nung anüdoklen Ladakh kübok Line of Actual Control (LAC) nung India aser China sepaitem tsüngda rara adokba sülen tang mezüng minister kati China semdanger.

Bodhbarnep Rajnath Singh-i X ajanga, "Shanghai cooperation organisation (SCO) defence minister tem senden nung adentsü atema tanü, June

25 anogo nung ni Qingdao, China-i aotsü," ta metetdakja liasü.

"Defence Minister tem den onük aika nung o lemteptsü atema ni maongka angutsü. Alima nung yimjung aser security atema India nunger mangdang lemsateptsü aser longjemer kiralongra samatsütsü atema ayongzüksü asoshi ni yongyar," ta pai metetdaksü.

SCO senden aliba mapang nungsa pai China defence minister aser Russia defence minister na den-a jurila senden mena tang West Asia tensa densema regional aser alima nung security tebilemtsü onük

balala lemsateptsü.

Ministry of defence-ia sangdong ka ajanga, "Defence Minister-i SCO tangatetbatem aser telemtetbatem atema India-i inyakba metetdaksüba den külemi alima nung yimjung aser security atema India mangdang lemsateptsü. Paisa region ajak nung kiralongra samatsütsü atema longjemer inyakba den külemi SCO linüktem tsüngda shishilembaba, rongsenkettzüng aser connectivity tsütsü taliba amalitepa inyaksü atema ayongzüksü," ta metetdaksü.

2001 küm China, Russia, Kazakhstan, Kyrgyzstan, Tajikistan aser Uzbekistan



June 25, 2025 nü Florida nung aliba Kennedy Space Centre nung launch pad nungi SpaceX Falcon 9 rocket den Crew Dragon capsule khakettsüdang tangokba noksa nung angur. India nunger astronaut, Shubhanshu Shukla den tangar asem International Space Station (ICC)-i apusoogo.

Union Cabinet-i Emergency anema bangzüng ka agizük

New Delhi, Aami/June 25 (Agencies): Bodhbarnü Union Cabinet-i küm 50 tejaklen tesüiba mapang Ato kilonser Indira Gandhi-i benokba 'Emergency' aija bangzüng ka agizük.

Osangbenertem den jembidang Union Minister Ashwini Vaishnaw-i, Ato kilonser Narendra Modi leniba nung Cabinet senden nung minute 2 shi mokremer Emergency mapang takoksa angurtem nem akhüm agütsü, ta metetdaksü.

"Emergency anema nokdakertem aser India linük temzüng alema inyakba anema nokdakertem tenüng nung iba anogomong amongtsü aser parnok nem akhüm agütsütsü atema Ato kilonser Modi leniba nung cabinet-i telemtetba agi," ta pai metetdaksü.

Iba anogomong nüngtem nung tanü Cabinet senden nung minute ana shi mokremer Emergency mapang takoksa angurtem nem akhüm agütsü, ta Vaishnaw-i ashi.

"Emergency mapang tashiyim amshiba anema tasü itta nokdangertem nem Union Cabinet-i akhüm agütsü. 2025 küm ya Samvidhan Hatya Diwas 50buba lir, iba ya India nunger puti otsü nung mamatoktetba mapang ka liasü, iba mapang nungji linük temzüng agien aser India nunger republic

aser democratic tanela anema inyak. Temeden balala magütsü aser meimchir taküm akhümket agiena liasü," ta pai ashi.

"Union Cabinet-isa, India nung nüburtemi maneni India linük temzüng nung tamang akar aser linük nung democratic tangatetbatem nung nokdaker ta bangjem. Akhidang asen linük temzüng aser democracy atema akanga nokdakertem nungi tajungshiba angutsüji lanurtem aser taintem naprongla atema kanga tongtibang. Democracy tetsü ka ama India ya linük temzüng wazüka ayuba aser kümzüka ayuba tsütsü tatishitsü linük ka. Linük ka ama asenoki asen linük temzüng wazüka ayutsü bangjemshidi," ta Union minister-i ashi.

Bodhbarnü Ato kilonser Modi-i, linük nung Emergency benokba ya India nunger puti otsü nung mapang tamajungtibatem rongnnung ka liasü; Congress-i democracy soita ayuba ajanga linük temzüng agiena liasü, ta metetdakja liasü.

Ato kilonserisa, Emergency mapang tatalokbatem bilemtetertem mesüra iba mapang nung timtemba kibongtemi social media ajanga itemji lemsateptsüla, kechiyong ibaji ajanga lanurtemi 1975 nungi 1977 küm tashi taaktsü mapang metettsü, ta ashi.



June 25, 2025 anogo nung Jammu nung tzünglu sashia aruba sülen State Disaster Response Force (SDRF) team kati Tawi ayong nungi nisung ka kümzükdang tangokba noksa nung angur.

Air India tayimtsü Black box India nunger ketdangsertemi bushisüngdang

New Delhi, June 25 (Agencies): June 12, 2025 anogo nung Ahmedabad nung tsükokba Air India tayimtsü nung aliba black box ji bendangleni meyok, saka India nunger ketdangsertemi repranga bushisüngdangdar, ta Civil Aviation Minister, K Rammohan Naidu-i metetdaksü.

Air India tayimtsü nung aliba black box ji Aircraft Accident Investigation Bureau (AAIB)-i repranga bushisüngdangdar, ta Naidu-i metetdaksü

London-i apusoba Air India tayimtsüji Ahmedabad nung aliba Sardar Vallabhbhai Patel International Airport nungi apusoba sülen minute ka majungdang tsükokba lendong nung tayimtsü nung mena alir nisung 241 densema nisung ajak senteper 270 asü.

Air India Boeing 787-8 Dreamliner tayimtsü tsükokba sülen anogo ka dang lir June 13

nü black box ji nguteta liasü.

Black box ji repranga osangtem bushitsü atema bendangleni yoktsü, ta olulu jembiba dak sendakba nung Naidu-i, "Ibaji parnok tebilemba jembiba dang lir. Black box ji India nung lir aser tang Aircraft Accident Investigation Bureau-i ibaji repranga bushisüngdangdar," ta metetdaksü.

Black box nung aliba osangtemji kodang tashi nung jangjatsü, ta asüngdangba langzüdang minister-i, "Iba ya technical mapa ka lir. AAIB-i ajakji inyaka bushisüngdangtsü," ta ashi.

Mongolbarnü FICCI aser Ministry of Civil Aviation nati senteper ayongzükbata Helicopters & Small Aircraft Summit 2025 sentong tembangba sülen osangbenertem den jembidang pai iba osang ya metetdakja liasü.



TIR YIMYIM YIMOBILEM (EDITORIAL)

DIMAPUR THURSDAY, JUNE (AAMI) 26, 2025

Trump-i junga inyakogo

Rarabo Israel o Iran na rara saka takokbo US tir Donald Trump-i angua ta asütsüsa pai inyaktetogo. Khen reprangtsübo Trump ya tangar US tir memesük, kanga tepelok aser mebilemdangi inyakba samaro nisungang ka mesük, saka tang Israel o Iran na rara nungang paji shiba-ar alimai metettsüsa pai inyakogo. Aji oda, Iran-bo Trump-i tuluba raksatsü aser takoksaa tuluba agütsü saka ano kin ana tsüngda yimjungbo paiang bener arutsü ta Trump-ji rara nung shilem agir masü saka yimjung yanglutsür-ang ka kumadokogo. Atangji, Donald Trump ajanga Israel aser Iran na rara anendaktsüba ya teti asoshi tanen akümtsü asü, mesüra ano ken o tangatettep kati marutet raratsüar ashitsü makok, saka iba rara ajanga alima tongpang rara tasembuba adoktsü südi ta ajaki kanga shisabolua bilema liasüba temulunga ajak anisüngzüka anendaktsüogo. Atangji, Israel aser Iran na anogo 12 raraba tongpang nung Iran nung akoksaba dang masü saka alima tsüngdanga kanga maksüogo, kechiyong Israel nungertemi Iran nung sepaitem alidak aser bomb yangludak amakba dang masü saka Iran nung sepai arkhudongtem aser nuclear bomb tesashi yanglur scientist-tem khasetba mapatemji Iran nung asoshi rara nung tamakok anguba dang nungi takoksa tuluba asütsü. Ajisüaka, US tir Donald Trump-i pa ket nung akaba bomb tesashi amshia Iran nung ali telunglen nuclear bomb yangludak tesem asem tashi mepoksatsü ka asübo, Iran nungertemi Israel anema kechi komaka inyakar lilar ashitsü makok. Aji oda, injang kata mekhadok ser tongpang akok amai, US nungerber shinga taküm mao aser teyirua meyiru saka Israel nungertemi inyakba mapatem dang nungibo parnokiang tuluba shilem agia tongpang raratsüogo. Atangji, Iran-ji la kija masü saka Russia aser China ama kin tulutemi asemer, iba jagi laa temulung ulu südi, ajisüaka US-i dena Iran amak tashi nunga tenati mapa agi Iran pu masembaji, ashiko, alima apayuba agi asütsüa akok, kechiyong tanü putu nung külen US aser külen China o Russia na ta ser tongpang rara tenzü kungbo ajibo alima rara tasembuba tenzüker süla. Atangji, China aser Russia nati Israel aser Iran na rara nung shilem magibaji US tsübuba agi masü saka alima rara metenzüküba agi asütsüa akok. Ibaji dang masü saka ano US tir Donald Trump wainshin metetba agi Russia kodamasü aküm asütsüa akok. Taküm küm tetenzüklen Trump tir akümdang, Russia o Ukraine na teraradak liasü aser US-i Ukraine pusema liasü. Ajisüaka, Donald Trump-ibo Ukraine pu masem aser Ukraine tir Zelenskyy par limai jar alimai ngua temerenshiang merenshiba asenokia nguogo. Alima kintem asoshi aji tesüngmangtsüka liasü, kechiyong Russia aser Ukraine na rara nung US-i Russia pu asemtsüba jibo shingai meimla. Ibaji tangang angateter, kechiyong US asoshi Israel-ang tongtibangtiba aser Iran yimten US küboki aidaktsütsüba jibo parnok asoshi kanga tenüngdaktsü, kechiyong Iran nung nuclear bomb meyangludaktsütsüba jibo tongtibangba masü saka Iran nung akaba ali rongsenjiang US asoshi tongtibangtiba lir. Aji oda, Russia aser Ukraine tongpang nung US-i Russia metenja mejembi asübo, Russia-ia tejashi marem Israel-Iran rara nung ya US-i shilem agiba mapang Israel anema inyakar lila. Item ajakji yimten yimsüsür kolok nungi adokba wainshintem lir. Tangbo, joko kin ajaki US-i ashiba tashi angatsüsa akümer, kechiyong US ya awashi temetet aser tashia tulu akaba kin ka lir. Aji oda, jashiaka awashi meteter dakbo kodanganga teka mai amato, US-i awashi meteta Ukraine yaritsü melen Russia yaria sayuba agi, Russia-ia Israel anema meinyaktet, Donald Trump-i Israel aser Iran na tsüngda rara anendaktsüogo. Atangji, Israel o Iran na rara nung Israel aser US nükjidongbo tongogo, kechiyong parnok taginüba ajak agi Iran nung nuclear bomb meyanglutsüla aser tanübo Iran nung itemji meyanglutettsüsa ajasatsüogo. Anungji, yimjung lapokba ya Iran asoshibo teka mekangba (surrender) amai ka dang lir. Tanü US aser Israel nati Iran nung tepuokdak ki tashi poksatsüogo. Joko, tanüngbajibo US-i shilem agia Iran tir Ayatollah Ali Khamenei melentsüba mapa dang anünga lir.

OLEMSABANG

TETSÜR TOBUR TAJUNG TILATEM

~ P.Renthy Jamir

(Yashi adok nungi...)

Lady Diana tobur ajungba nüngsang ulura liasü. Shibai metet la kanga asükteta tobur tajung masü asübo tanü tashi taküm lila ta bilemer. Lai tobur ajung dak mulung lemer kinungpur aser tenü toko süngpu apua melitet südi aser palalular kibong ka kümer ano ajemajema melitet. La tobur ajungba ajanga England nung nung nem maaksü dang bener arutsü. Lai Charles unfit to rule ta ashibajia o tajung masü.

Ano kadang Lai nung tetsür tobur tajungtilatem kar repringdangdir parnok ajanga bentsür aruba mapatemji teimba jangratemtsü masü. Persia yimli nung Ahasuerus chuba kinungtsü Vasti onsara alakteta tobur ajungbayong la tobur ajung chubai tangar dang sayunü dang palaonlatsüsa mapangi bentsür aru. Uria kinungtsü Bath-Sheba tobur onsara ajungba ajanga David chubar kibong teti atema nok atoktsüsa akum aser Israel sepoy takotet tanishir taküm Uria samadaktsü. Ano Davider jala Tamar tobur ajungbayong Davider kibongdangi menameya azütokshiba-ang bentsür aru. Yamaji Aor otsü nunga lteben tobur ajungba khonang nüngsang tetushi ulura liasü saka la nungi tsürabur yimer tajangzük kecha bentsür maru. La taküm libaliru agi tsürabur umzüka otsü dang jembar. Ano Nokrang tongtibar jala tobur onsara junga sotetba khonang Ahom lima tashi lua ayimsünga ao. Saka la tobur ajungba ajanga Nokrang yim samatsüsa tesü tiabai bentsür aru. Yamajisa Sentishila/Changtongyala onsara tobur junga sotetba agi Ahom chubai miima auyar aoba ajanga yimer nübu jenti tsüka nüken nüktzü atenba otsü jembar. Ano Kilangnaro, Temshinaro ta-a ajar. Tetemjen aiür tobur onsara junga sotet saka lai yimer asangur shinga agia tenük mesüngi tesü la taküm anojungi menenmejia asütsüsa mapangi bentsür arunung tsüraburi tejashi mesüngzükteti la mangyimjen ayim anungji Tsüngiriju nungeri ken yamai aten ta otsü jembar aru.

Jio amang yangnüko tebi alak teba teheb

Tsüngiriju senden jebdini

Naro hasang melang naro süngti kongro

Ayimyala Tzüpen Longritzü nung tetzüseni

Temlen azüngdar Temshinaro lua arungni.

Ratet: La asüba atema tetsü tebu ojang jebang

Tsüngiriju nungeri ajak ner kidang sendena ajebtsü

Naro tajungtila Temshinaro oa longritzü nungji

Yim ajak azüngdar teka memetsüki meypa

arung. Ta aten aser ang tsürabur ajeba anen.

Akhi mapang Aori tetsür onsara temjena sotetbaji kar arüsüa aor kar pei tebuba memoar ta jembar aru. Tetsür tobur ajung mapayur Shinga mali anungji tesangra per jagia Adam masü Evala külakoktsü I.Timoti 2:14. Anungji Solomoni tetsür tobur tajung aika tendanga parnok libaliru shisadanger yamai zülua toktsü "Mera aketbaji külakoktsüba aser tobur ajungbaji amajok lir. Saka tetsür shibai Kibuba tsübudir la asangtsü tim." A. Shin 31:30.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nisung kati New River Bible Chapel nung Pastor tepsetba nangzük



June 25, 2025: Adam Christopher Sheafe, ta ser nisung kati Arizona nung aliba New River Bible Chapel nung Pastor, William Schonemann tepsetba nangzükogo.

Sheafe-i, pai pastor meta-a tepset aser pa kolak nung ai korang semtsü, ta ashi.

Paisa, linük tesem balala nung Arogo nung santem lenmang tezüleni anir pastor/putir 14 tepsettsü tebilemba liasü, ta metetdaksü.

Arrshi küm 51, Sheafe-i, "Sedona nung ketdangsertemi ni mapu asübo ni iba (Arizona) state kija nunga pastor pezübo tepseter lila," ta ashi.

Paisa, "Arrshi küm 76 pastor Schonemann tepsetba atema ni kecha mesasar. Akok dang asü nungbo ni America nung pastor ajak tepsettsü aser Tenla ki ajak rongdoktsütsü," ta ashi.

"Ni kecha mesasar, aser iba

lima nung kübui kü nem tashi agütsü asübo ni putir ajak tepsetla aser Tenla ki ajak mitsü kuma rongdoktsüla," ta pai ashi.

Sheafe ya tang Flagstaff nung aliba Coconino County Detention Center nung puoka lir.

Ketdangsertemi Sheafe mapudangyongi April 30 nü Maricopa County Sheriff office-i pastor Schonemann tepsetba ken o nung pa anema ken o benoker liasü.

Iba dak alia Federal Bureau of Investigation (FBI) densema ketdangsertemi Sheafe anema ozüng alema inyakba ken o aika benoka lir.

Tamalen osangbenertem den jembidang Maricopa County Sheriff Office Capt. David Lee-i, Sheafe-i pastor Schonemann tepsetba aser tangartem anema inyakba ya

tamangba yimsü den sendaktepa lir, ta metetdakja liasü.

Ketdangsertemi Sheafe mapu asübo pai ashiba amaji pai pastor tem aser putirtem aika tepseter lila ta bilemer.

Sheafe-i, pai Las Vegas, Nevada; Portland, Oregon; Seattle, Washington; Billings, Montana; Detroit, Michigan; New York, New York; Charlotte, North Carolina; Mobile, Alabama; Beaumont, Texas aser El Paso, Texas yimtitemia oa pastor tem aika tepsettsü sentong liasü aser Arizona nunga pastor pezü tepsettsü sentong liasü, ta metetdaksü.

Taküm April 28 anogo nung pastor Schonemann par kidang sür lia angu. Pa temang nung zübo aika liasü aser pa teka anaprong songlar yipten nung angenloker angu.

Odisha kübok Malkangiri district nung Khristantem dak azük

June 25, 2025: June 21 nü Odisha nung Malkangiri district kübok Kotamateru yimdak Protestant Khristantemi Hindu yimsü dangi meyiptsü memelungba agi telok kati parnok dak azük.

Iba tatalokba nung Khristan ti kanga mejungi yirua district hospital-i anir ao, ta Khristan lenirtemi metetdaksü.

Khristantemji tekülem sentong ka nung adenba sülen kidangi meyipa aoba mapang nung telok kati parnok longbanga liasü.

Tenük kuli alirtemi ashiba agi, Khristantem jagi Hindu yimsü agizüktsü memelunger, ta shia lokti jagi parnok dak azük.

Police-ia, iba tatalokba nungji Khristan aika yiruogo aser tang iba tatalokbaji bushisüngdangdar, ta metetdaksü.

Odisha tesem balala nung mapang shia Bajrang Dal züngsemtemi kangshia Khristantem Hindu yimsü dangi meyipdaksütsü meranger.

Iba region nungji alir

Khristan telok kati ashiba agi, Hindu telok kari minorities anema "Save Culture" campaign tenzükogo.

Rashtriya Christian Morcha nung lenir, Pallab Lima-i, "Joko tesüiba ita ishika tensa mejungi arur. Khristantem aika amokmerener. Khristantem anema inyakba ya asalentong yanglur inyakba lir," ta metetdaksü.

June 21 nü lokti jagi Khristantem dak azükba mapang nung nisung kati pastor ka nem iba osangji metetdaksüba sülen pastor jagi police aja.

Iba tatalokba anema yangji aliba Khristantemi longkak aitba sentong ka agiba sülen Malkangiri district superintendent of police nem temepishiba shidi ka agütsü.

Khristan lenirtemi ashiba agi, June 21 anogo tatalokba nung yirua hospital nung amonger Khristantem jagi kidangi meyipa aotsü tsübur.

Putir, Sushil Kumar Gouda densema Khristan lenirtemi,

Malkangiri nung tribal Khristantemji aika kanga sensakertem lir, aser mapang shia tribal Khristantemi amokmeren ajangshiba dang masü saka yimdak nungia meindoker.

Odisha nung nütsüng shilem 93 bo Hindu nungertem lir. 2008 küm Odisha kübok Kandhamal district nung Khristantem aika tepsetba mapang nungi tenzuka mapang shia state nung Khristantem anema inyakba kanga bulua kümogo.

India linük temzüng ajanga senso ajak nem tamangba yimsü temeden agüja lir, ajisüaka state balala nung Khristantem densema tanga minorities anema inyakba kanga bulua ataloker.

India tesem aika nung Khristantemi reshikangshi ajuruaka aikati pei tamang jenjang manokshii maneni tekülem sentong aser sarasadem sentong ayongzüka agir, ta Khristan lenirtemi metetdaksü.

ANOGO ABEN TSÜNGREM DEN

Pa tsüngdang

Osangtajung nung asenoki Mary asemben angur, aser item mapa ajak nung kasa jenjang nung Yisu tsüngdang mener angur.

Bethany nung kidang, Mary Yisu tsüngdang mener Yisu o angaba angur. Kodang Lazar asüba osang angashia Yisu Bethany-i meyipa aru, Mary jashia Yisu tsüngdang amenba angur. Tasemben buba nung Yisu tushia pa tsüngdang amen. Mary teti Yisu tsüngdang amen ta asenoki bilemer. Tepela anogo nung tangazüker tajung ka ama lai Yisu tsüngdang mener Pa o tzuratema anga. Tejashi anogo nung tesünep tepela angutsü asoshi la tejashi bener Yisu tsüngdang amen.

Mary sempet nung la akaba tajungtiba bener aru. Asenoki teti Yisu dangi asen tajungtiba bener aotsüla. Yisu meimba, aser Pa nem mezüngbuba menden agütsüba dak alema Pa nem agütsütsü alima nung tajungba sempet mali. Aseni asen tepenjem taküm Pa nem agütsütsüla. Aseni asen mapa tajungtibaji agütsütsüla, tejashi aser tebilemtsü mapang dang masü. Asen mapa tajungtiba inyakbaji Pa nem sempet agütsüba lir.

Damascus nung Tenla ki amakba Khristan lenirtemi sashia aitsür

June 25, 2025: Khristan ajemdaker tashiyim amshiba lenirtemi dang masü saka United Nations nung lenirtemia June 22 nü Syria yimtiba, Damascus nung kiralongrartemi bomb amshia Greek Orthodox Church Tenla ki amakba sashia aitsüogo.

Syria sorkari, Tenla ki amakba ya Islamic State kiralongrartemi lir, ta metetdaksü.

Greek Orthodox Patriarchate of Antioch aser Ecumenical Patriarch Bartholomew-i Patriarch John X of Antioch dangi call süa tejashi lemsatep.

Jerusalem nunga Patriarchs aser Arogo nung lenirtemi sangdong ka ajanga iba tatalokba sashia aitsüogo.

"Khrista nung asen adianutem anema inyakba ya onoki sashia aitsür aser Syria nung interim sorkar dang aibelenertemji pua ozüng matsüngdangi anir arutsü, iba denji külemi Syria telung nung Khristantem aser tanga yimsü balala amanger ajak nem security agütsüba den yimsü temeden kümzüktsü atema inyakang ta onoki akhanger," ta Arogo lenirtemi metetdaksü.

"Temeshi tesem ka nung tai maket nisungtem tepsetba asoshi temeden kecha mali," ta Assembly of Catholic Ordinaries of Holy Land-ia sangdong ka ajanga metetdaksü.

"Tamangba yimsü nung

ajemdaker tashiyim amshiba ya temeshiba anema inyakba lir. Iba ya o agi rasaa jembitsü makokba temenen mapa, meimchirtem anema inyakba aser Tsüngrem matsüngdang temenen lir," ta parnokisa metetdaksü.

UN Secretary-General, António Guterres-ia iba tatalokba sashia aitsüba den külemi iba tatalokba nung takoksa angur kibongtem den mangyim jashi lemsatep aser yirua alirtem tekeraba nung aneptsü atema sarasademtsür, ta lemsatep.

Paisa, "Kiralongrar ajakji pua temerenshi agütsütsüla," ta ashi.

"Secretary-General-i, Syria nung nüburtemi yimjung, taküm akhümket aser ochi temeden atema inyakba nung United Nations-i nungita yaritsü ta shiogo," ta UN Secretary General atema otongdar, Stéphane Dujarric-i metetdaksü.

UN Special Envoy for Syria, Geir Pedersen-ia iba tatalokba sashia aitsüba den külemi iba tatalokba jungjunga bushisüngdangtsüla, ta takhangba agütsü.

June 22 anogo nung Damascus nung aliba Mar Elias Arogo Tenla kidang kiralongrar kati pa temang nung bomb alenloker pokdaksüba lendong nung nisung 22 pokset aser nisung 60 dak tali yirua liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tepezü**

(adj) anüalem, temang nung ashi-mashi memetet (lethargic, numbness)

* Tepezü nisungi mapa kecha nunga yimer memeneptsü.

Tepi

(n) temekok nungi telongporet tamentep tashi tamang shilem (thigh)

* Onoki tulur arudang sempet ak tepi ka agütsü



Tir Yimyim

OLONG PAITEP # 7191

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A___g

-(3)

6. Mopung apodoka

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S___k

-(3)

14. T___r

-(3)

OLONG PAITEP # 7190 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER MA

Wimbledon asaya tenzüker 2027 küm küm 150 ajungba nungdem nung Wimbledon anaben tashi koker aliba Britain nung asayar Andy Murray indang keral yanglu ka amenoktsütsü, aser iba ya design asütsü atema pai teyari agütsütsü. Wimbledon ayongertemi ashiba agi, parnoki iba kerak yanglu ya 2027 küm asayamung mapang sayatsü sentong lir. Küm 77 tashi Britain nung asayar kati dang kidang Wimbledon asayamung tebur kija mekoki aliba 2013 küm Murray-i koka liasü. Final nung pai Novak Djokovic tsükdaksü. Paisa, iba asayamung ya 2016 küm tanaben koka liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura CM-i temesepba mozü anema raratsü sangdong

International Day Against Drug Abuse and Illicit Trafficking amungba anogo nung Tripura Chief Minister Manik Saha-i temesepba mozü ayokertem nem tekümdangtsü metetdaksüogo.

Agartala, Aami/June 25

(Agencies): International Day Against Drug Abuse and Illicit Trafficking amungba anogo Tripura Chief Minister Manik Saha-i, temesepba mozü ayokertem nem tekümdangtsü ka metetdaksüogo aser temesepba mozü anema raratsü ta sangdongogo. Paisa, Tripura ya Bangladesh den arrtsü nung aliba ajanga temesepba mozü shibelenba lenmang ka kümogo, ta ashi.

Narcotics Control Bureau, Tripura Zonal Unit-i ayongzükba sentong nungsa Chief Minister-i motorcycle rally ka tenzüksü aser azü tenlaba camp ka nung shilem agia liasü.

"Temesepba mozü

shibelenertemi Tripura ya lenmang ka ama amshir. Mero mero ajanga iba ozüng alema inyaksangshiba maparen tali ajungmesor, saka asen chirnurtem timtemdar. Iba yagi parnok azü menentsür," ta Saha-i ashi.

Iba tebilemtsü ya bentettsü atema state sorkari district ti nung drug de-addiction centre tem amenoktsüba sangdongogo aser centre shia atema sen crore anana lezmüksüogo.

Ministry of Development of North Eastern Region (DoNER)-i iba mapa atema sen crore 198 snction sütsüogo, kong Agartala nung state-of-the-art centre ka yanglutsüba densema lir.

Saha-i ashiba agi, sorkari

guideline tasenba kübok state nung tang inyaksangshia aliba jurila de-addiction centre tem kanga junga asadangdar.

CM-isa, temesepba mozü shibelenertem shinga metoktsütsü ta tenangzükba agütsüogo. Paisa temesepba mozü shibelenba anema jenjang agibatam indang metetdaksü aser ashiba agi, 2023 aser 2025 küm tsüngda temesepba mozü apuba shilem 103 aser temesepba mozü raksa intoktsüba shilem 130 agi timba kümogo.

Maneni Sahaa-i, arrtsü adena temesepba mozü shibelenba nokdanga lanurtem kümzüka ayutsü sorkar bendanga agütsür aliba nenshia metetdaksü.

Mizoram nung Myanmar nunger biometric enrolment tenzüksü

Aizawl, Aami/June 25
(Agencies): Mizoram nung tang jenoka aliba Myanmar nunger 32,000 dak tema züngoksemtsü atema Mizoram sorkari July ita biometric enrolment campaign ka tenzüksü.

Ketdangsurtemi ashiba agi, iba inyakyim ya Foreigner Identification Portal dak metaloker inyaksü, koba biometric aser demographic data naprongla bendentsü atema National Informatics Centre (NIC)-i yangluba digital platform ka lir.

State Home Secretary Vanlalmawia-i ashiba agi, iba enrolment drive atema renemshiba tembangtsü atema district ketdangsurtem nem tetuyuba agüjatokogo.

"Onoki district team tem

atema taoba hopta training ayongzüka katsüogo aser taruba ita nungi data bendentsü sentong lir," ta pai ashi.

District ajak nung iba inyakyim ya Deputy Commissioner lenisüba nung Displaced Persons dak sendakba nung District Level Committee kati achaayangtsü. Home Minister K Sapdanga tekolak ser State Level Committee kati inyakyim ajak achaayangtsü.

Vanlalmawia-i ashiba agi, technical tsütsü tetsükdaksü adokba ajanga inyakyim menomeyangdaksüogo. "Iba portal indang original configuration ya kuli kaket maliba immigrants tem meyipa yoktsü atema design sür liasü, saka Myanmar nungi jena arurtem ya displaced persons

tem ama officially agizüker," ta pai ashi.

Ministry of Home Affairs-i system lepa reprangshiba sülen jenjang agiyonga aotsü atema state nem temelaba agütsüogo.

Iba hopta NIC engineers temi iba portal amshitsü atema district-level staff tem nem training agütsütsü imlar. "Ajak renema lir asünung onoki registration tenzüksü," ta Vanlalmawia-i ashi.

Tang Mizoram nung Myanmar nunger 32,419 jenoka lir. Myanmar den arrtsü nung aliba Champhai district nung Myanmar nunger 13,586 jenoka lir, koba district ajak dang timba lir.

Lawngtlai aser Siaha na nunga nisung 6,017 aser 5,036 jenoka lir aser Aizawl nung nisung 3,669 aser Kolasib district nung nisung 129 jenoka lir.

Manipur: Indo-Myanmar arrtsü anasa sen lakh 14 alang moko apu

Imphal, Aami/June 25
(Agencies): Indian Army aser Assam Rifles na senteper Manipur kübok Indo-Myanmar arrtsü anasa sen lakh 14 alang tenokdangba agütsür aliba moko agi yangluba osettem puogo, ta ketdangsurtemi metetdaksü.

Itangitertem nungi osang tejangja angazükba sülen Tengnoupal district kübok Moreh-

Chandel lenmang nung taoba ghonda 24 tsüngda meita aoba sentong benoka inyaka liasü.

Defence Wing sangdong ka ajanga ashiba agi, sepaitemi temulung melemi bilemba gari ka Road Opening Party (ROP) Picket No. 18 den atonga aliba football ground ka anasa sot.

Bushisüngdangba sülen security personnel temi Win Win

brand cigarettes bongdang 14,000 talep 28 nung alepa bener aliba nguteta liasü. Iba moko ya Myanmar nungi shibelenar aru asütsü ta temulung melemi bilemer.

Ken o dak sendakba nung nisung ka puogo. Sepaitemi apuba oset den gari aser aija alisang ya ketdangsurtem nem bendanga agütsüogo.

UK-i nuclear nok-nü bentetba F-35A fighter jets 12 alitsü

London, Aami/June 25 (Agencies): United Kingdom-i tactical nuclear weapons bentetba F-35A fighter jets 12 alitsü sentong lir, aser ibai aso ka nung UK indang nuclear jenjang tashi itshiba tulutiba alitsü, ta Ato Kilonser Keir Starmer indang office ajanga ashi.

Iba tayimtsü alitsüba osang Starmer-i Bodhbarnü The Hague nung sangdongtsü, kong NATO lenirtemi parnok defence tsütsü sen tali indoktsü jembitsü imlar

Cold War tembangba sülen UK indang air force-i tang mezüngbuba nuclear nok-nü bener jajatettsü.

Tang UK-i nuclear amshitetba tashi ya submarine-launched missiles dang lir.

"Tarutsü jenjang mejangja aliba putu ka nung asenoki yimjung kisüng nung temulung lema melitettsü, aser iba yongji ozü sorkari asen national security nung sen indoker," ta Starmer-i sangdong ka nung ashi.

"Item F35 dual-capable aircraft yagi asen Royal Air Force atema putu tasen sangdongtsü aser UK aser asen allies amokmerenba tsükchir tem nokdangtsü."

NATO Secretary-General Mark Rutte-i sangdong ka nung iba osang pai pelashishia agizüker ta ashi aser ibai ano NATO nung British nungeri shilem tajung agiba ka alitsü ta ashi.

United States company Lockheed Martin ajanga yangluba F-35A ya F-35B den mesükteper, koba tang UK air force-i amshir, saka yangji conventional weapons den külemi nuclear bombs bener senzüteter.

European territory nung US,

Germany aser Italy densema NATO züngsem tenet indang dual-capable planes ya lir, koba ajanga US B61 nuclear warheads kasa benteter.

Iba tayimtsü ya NATO indang nuclear dual-capable aircraft mission nung amshitsü, anungji alliance indang nuclear deterrence posture tashi itshitsü, ta Downing Street ajanga ashi.

Jets tasentem ya Marham airbase nung alitsü aser item tayimtsü aliba ajanga UK nung mapa 20,000 yaritsü imlar, kechiaser jets atema global supply chain shilem 15 shi iba linük nung amendaka lir.

The Hague nung senden amendang züngsem linük 32 aliba NATO nungya defence tsütsü gross domestic product (GDP) shilem 2 aliba nungi shilem 5 indoktsü mulungtepa agizüksü imlar.

UK-i spending targets nung aliba ama inyaktsü züngzüka lir aser attack submarines aser munitions factories tasen yangluba nung sen jenti indoktsü sangdonga lir.

Alliance indang senotsü tebilemtsü US-i tali abener ta Trump administration-i tenüng asenba sülen defence budget ya timba akumtsü. Spending targets matongba linüktema alliance temi kumzüka ayutsü asü ta US Tir Donald Trump-i asüngdang aser iba bloc yutsütsüa amokmerena lir.

Russia-i timtem agütsüba nung langzüa danga linük temia pei indang mitkar nung sen tali indoktsü yimya sayur, aser German Chancellor Friedrich Merz-ia Europe nung conventional army tashi tulutiba akumtsüsa Germany-i sen indoktsü ta Mongulbarnü shia liasü.

Pakistan-i US atongtsüsa nuclear ballistic missile yanglur

Islamabad, Aami/June 25 (Agencies): Operation Sindoor sülen Pakistan-i China teyari nung nuclear arsenal ulushitsü lenmang bushir ta osangtem angazüka aliba mapang ka nung Pakistan mitkar temi United States tongtettsüsa nuclear-tipped intercontinental ballistic missile yanglutsü meranger ta Foreign Affairs ajanga ashi.

Intercontinental Ballistic Missiles (ICBMs) nungya nuclear aser conventional warheads tem inoka amshiteter aser meta 5,500 kilometer talang nunga khaloktsüteter.

US ketdangsür temi ashiba agi, Pakistan-i iba ama missile ya yanglutetra Washington-i Pakistan ya 'nuclear adversary' ama züngshitsü, ta osang ajanga ashi. Tang Russia, China aser North Korea ya US indang tsükchir ka ama züngshir.

Region nung tensa majungba, talisa India-i 1974

küm mezüngbuba nuclear tendangba sülen Pakistan indang nuclear nok-nü sentong ya 1970s tetenzüklen nungi inyak tenzük. Parnoki nuclear tests trok agiba sülen iba linük ya 1998 küm nuclear-armed state ka akum.

Pakistan-i iba ama missile yanglutsü telemtetba agiba ya India indang mitkar tashi uluba nung langzüa aser advanced missile defence systems nung investment ka amai lir.

India mitkar tashi uluba den tokteptsü asoshi Pakistan-i mapang talangka nungi par nuclear arsenal nung metaloka arur, saka tang terenlok tasen ya ajanga region nung nok-nü yanglutepba nung tali temulung agütsüba temaitsü lir.

Pakistan indang nuclear mangdang ya Washington asoshi mapang talangka nungi tebilemtsü liasü, talisa iba linük ya China den tesendaktep

tajung lir, shir nuclear aser missile arsenal kanga züiner. Pakistan indang nuclear stockpile ulushiba asoshi Washington-i tebilemtsü akaba lemsatepogo aser ICBM yagi region nung kisüng masü saka alima ajunga security nung timtem alitsü tsübor.

Pakistan indang nuclear sentong nung China-i tongti shilem agir. China-i yimjak nungbo Pakistan-i ICBM yangluba yarir ta sangdonga mali, saka Pakistan mitkar nem teyari agütsüba aser rongsen indokba ajanga Islamabad defence tashi ulushidaktsür.

India aser US asoshi tebilemtsü tulutibaji Pakistan indang nuclear arsenal ya lir. Pakistan ya akhi mapang nungi tashi mait aser telungpur teloktem jenti lir, anungji kiralongrar temi iba amala tashi tait nok-nü amshitet nungbo tebilemtsü tulu asütsü.

Iran-i nuclear sentong tenzükshira ano amaktsü: Trump

The Hague, Aami/June 25 (Agencies): US-i Iran indang nuclear sites nung amakba ya operation tetangshi ka lir aser Iran-i nuclear sentong tenzükshira ozü linüki ano amaktsü, ta US Tir Donald Trump-i Bodhbarnü ashi.

Iranian nuclear sites amakba sülen itdangiter temi ladangba ya tabensa masü saka teraksatsüba kanga tesashi alitsü, ta US tir ashi.

"US-i Iran indang nuclear sites nung amakba ya tetangshi operation ka liasü. Itdangiter mabensa," ta Trump-i ashi.

"Itdangiter temi memetet ta ashir. Teraksa kanga tesashi alitsü akok. Itdangiter temi



yamaji ashi," ta Trump-i NATO summit nung linük balala nungi lenirtem den senden amentsü lia osangbener dang ashi.

"Ibai kanga tesashi liasü. Yangji okshia samatsüba lir," ta pai ashi.

Israel aser Iran tsüngta ceasefire aliba indang jembidang, junga dang otar aser Iran nem uranium enrichment metenzükshidaktsütsü, ta pai ashi.

"Iran-Israel ceasefire kanga junga otar," ta pai ashi aser tawa amakba sülen Iran nem uranium enrichment metenzükshidaktsütsü, ta Trump-i ashi.

"Parnoki kodanga meinyaktsü ama ni bilemer, aser onoki mitkar tsütsü nungi memelatsü," ta ashi.

Iran-i nuclear enrichment programme tanaben yanglushira United States-i ano amaktsü asü, ta asüngdang dang. "Hao," ta Trump-i langzü.

US-i amakba ajanga Iran nung nuclear sites meraksatsü ta media osang balala ajanga ashiba Bodhbarnep Trump-i aija liasü.

CNN aser The New York Times lungjemer puti otsü nung takok tulutiba military strike mezüngmeshi aser item ya osang taila lir, ta Trump-i shia liasü.

jembiba nenshia ashi.

Itdangiter osang ajanga CNN dang Iran indang nuclear facilities nung centrifuges timba shidak mapa inyaker aser US-i mamakdang enriched uranium stockpiles dang belener liasü ta ashir.

US-i Iran indang Fordow, Natanz aser Isfahan nuclear sites amakdang ali tema nung aliba power infrastructure aser uranium metal conversions nung amshiba facilities kanga sashia raksatsü, ajisüaka ali telung nung aliba enrichment systems meraksatsütet, ta CNN ajanga shia liasü.

Osang ajangasa ashiba agi, US-i B-2 bombers amshia 30,000-pound bunker-buster bombs ter dak tema tsükdaktsü, saka ali telung nung aliba ki o jen timba meraksa.

US-i mamakdang yongi Israel-i maka liasü aser parnokia Fordow nung imlaba dang nungi tajemba raksar aliba ngutet. Ajisüaka linük ana lungjemer amakba ajanga Iran indang nuclear mangdang küm ana tashi agi menutsü, ta CNN ajanga ashi.

Commercial satellite nungi tangokba noksa tem nunga nuclear plant ali telung nung aliba aser uranium-enriching centrifuges tem kanga sashia raksatsür ama sayu. Saka tang tashi iba indang Iran sorkari sangdong kecha agüja mali.

GOVERNEMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

NO. DTE/ ESTT-2/02/2025-26/ 6551Dt. Kohima, theth June, 2025

NOTIFICATION

In continuation to this office notification of even number dated 20th May, 2025, the intending candidates of Common University Entrance Test (CUET-UG) are hereby informed that the last date for submission of the CUET-UG filled up form along with score card has been extended for a period of 7 days from the date of declaration of CUET-UG result.

(Er. VIPULHOU LHOUNGU)
Director

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA

Website: www.highereducation.nagaland.gov.inEmail: dir.highedu@gmail.com

NO.HED/SCHO/MISC/36/2025/Kohima, dated theJune 2025

Timeline for opening and closing of National Portal Scholarship (NSP) for Post Matric Scholarship (PMS ST) to ST students of Nagaland and Common Scholarship Portal (CSP) for State Merit & Research Scholarship, Academic Session 2025-2026.

This is to inform all Educational Institutions and Students that the timeline for the Academic Session 2025-26 in respect of the CSS-Post Matric Scholarship (PMS ST) for the ST students of Nagaland via the National Scholarship Portal (NSP) i.e., https://scholarships.gov.in and the State Merit & Research Scholarship via the Common Scholarship Portal (CSP) i.e., https://scholarship.nagaland.gov.inis to be followed as:-

PROCESS	FRESH/ RENEWAL
Registration for the Students	7 th July 2025 till 30 th September 2025
Completion of verification by the Institutes	31 st October 2025
Correction of defective applications by the Students & the Institutes	15 th November 2025
Completion of verification by the State	30 th November 2025

Sd/-
(V. LOVITOLY SEMA), NCS
Ex-Officio Director
Higher Education, Nagaland: Kohima

Gout-i Golden Spike nung otsü tasen ka yanglu



Aami/June 25, 2025 (Agencies): Ostrava nung Golden Spike meeting nung tebur 200m asemtepba akokba sülen lanur asayar Gout Gout-i Australian record tasen ka yangluogo. Pa tang mezügbuba senior asayamung ka nung asaya liasü.

Arishi küm 17 tain asayar yagi Europe nung mezügbuba asayaba mapang alizüing 20.02 seconds nung tongteta liasü.

Gout-i, Portugal nung amendaker aliba Cuba nunger asayar Reynier Mena ajatet, shibai taoba Diamond League ana nung 200m asemtepba koker liasü.

"Ni kanga pelar. Europe nung mezügbuba asemtepba mapa ni kü indang career nung alizüing

tekaratiba tongtetba den national record tasen ka yangluogo," ta Gout Gout-i ashi.

Kasa asemtepba nung Britain nunger Nethaneel Mitchell-Blake tasembuba jenjang nung liasü. Pai alizüing 20.60 second nung atong, koba pa asoshi taküm alizüing takaratiba tongtetba liasü.

Gout ya nüngtugu asayar aser Olympic nung gold medal ti tashi ngur alisang Usain Bolt den medemdanga arudar, aser pai Ostrava nung alizüing tongtetba mapang ya Bolt dang nungi takaraba liasü, shibai 2006 küm mezügbuba Golden Spike nung asayaba mapang alizüing 20.28 nung tongteta liasü.

Ajisüaka Gout-i ano tang tashi nung seconds 20 tekübok

nung alizüing tongteta mali, koba Bolt-i pa arishi küm 18 ajungtsü ita pezü anunga lia Bermuda nung asemba mapang alizüing 19.93 nung tongteta ajangzükteter lir.

Gout-i December ita asemba mapang alizüing 20.04 nung tongteta Olympic silver medallist Peter Norman-i bena aliba Australian record ajatet aser iba takok ya pa indang personal best-a liasü.

Youth asayamungtem amokbanger asayaba sülen Gout tang senior tem den asaya tenzüko.

Pai 100m aser 200m naprongla nung Australian under-16 record bena lir aser taoba küm national under-20 100m title aben aser iba sülen Lima nung World Under-20 Championships nung 200m asemtepba nung silver medal ngua liasü.

Queensland nungi 2024 GPS Track & Field Championships nung 200m aser 400m nung takok anguba sülen Gout ya professional asayar ka aküm aser Adidas den sponsorship deal ka yanglua liasü.

Pa September ita asayatsü aliba World Championships atema maneni renemtsü aser iba mapang July 11 nü Monaco Diamond League nunga shilem agitsü.

Taküm World Championships ya September 13 nungi 21 tashi Tokyo, Japan nung asayatsü.

Neymar-i Santos den tenangzüktepba yanglushiogo



Aami/June 25, 2025 (Agencies): Brazil nunger asayartem rongnungi tang tashi nung goal timtiba idaktsür aliba asayar Neymar-i, pa lanuwa nungi asayaba club Santos den December tashi tenangzüktepba ka yangluogo.

Arisihi küm 33 tain asayar yagi Saudi Pro League club Al-Hilal den pilaba sülen January ita iba Brazil club den ita trok atema tenangzüktepba yanglua liasü.

Santos nungi asayaba mapang Neymar-i asaya 243

nung goal 141 idaktsü aser assist 69 sütsür lir.

Taoba mapang Paris St-Germain aser Barcelona nungi asayar ya Santos den tenangzüktepba ka meyanglu tsüingda Europe-i meyipa aotsü atema sendaktepba liasü, ajisüaka tang Brazilian Serie A season matem tashi asayatsü asoshi tenangzüktepba ka yangluogo, aser iba tenangzüktepba atsülangshitsü atema lenmang sadema lapoka yuogo.

"Kü mulungi kechi ashir aji

anga ni telemtetba ka agiogo," ta Neymar-i ashi.

"Santos ya kü team dang masü saka ya kü ki, kü tera, kü puti otsü aser kü taküm lir. Idaki ni tebur chanu ka aliba nungi nisung aküm aser idaki ni chichia meimogo. Idaki ni kanga pelar.

"Ni kü indang career nung metongteti aliba nükjidongtem idaki tongner, aser kichaia ni mesottetsü. Ni ao ni meyipa aru aser ni idaki alitsü. Idaki ajak tenzüker aser idaki kodanga mademtsü," ta pai ashi.

Ita 17 sülen Neymar March ita Brazil team nung züingoksem, saka pa Colombia aser Argentina na den World Cup qualifiers nung masayatet.

Pai Brazil tenüing nungi 128 ben asayaba mapang goal 79 idaktsür lir, saka pa 2023 küm October ita Uruguay den asayaba mapang temekok yiruba sülen linük tenüing nungi khen danga masayai lir.

"Iba ya Brazilian football atema otsüsütsü anogo ka aser Santos FC fan tem atema sempet ka lir," ta club tir Marcelo Teixeira-i ashi.

Taoba England midfielder Lallana asaya nungi anener

Aami/June 25, 2025 (Agencies): Taoba mapang England team nungi midfielder Adam Lallana, arishi küm 37buba nung asaya nungi anisüingzüker.

Lallana, shiba linük tenüing nungi 34 asayar lir, pa taoba season Southampton-i tanaben meyipa arua liasü. Pa mezüing iba club nungi asayaba mapang tenüing yanglua liasü.

Pa 2014 küm pound million 25 yong Southampton nungi Liverpool nung oa aden aser Premier League o Champions League naprongla koka liasü.

"Ni kanga nema danga aser temulung nung tenüingsang agi sünger asaya nungi anisüingzüker," ta Lallana-i pa indang social media account tem nung zülutsü.

"Southampton nung ni asaya tenzüker aser idaki tembanger. Ni tanü kechi jenjang nung lir ajakji iba club ajanga lir," ta pai ashi.

Lallana ya Southampton academy nungi anitetba asayar ka aser pa 2006 küm arishi küm 18 asüba mapang first team nungi mezüingbuba asaya liasü.

Pa iba club nungi 250 dak temaben asayaogo aser League

One nungi Premier League-i aiba squad nung pa densema liasü.

Pa Liverpool-i aoba mapang Southampton indang captain liasü aser pa England tenüing nungi 2014 World Cup nunga asayaogo.

2019 küm Liverpool nungi asayaba mapang Champions League aser taruba küm league title abenba sülen Lallana Brighton-i ao aser 2024 küm St Mary-i meyipa aru.

Pa taoba season Saints nungi ponguben dang tetenzük nungi asaya aser par team relegated süa Championship-i luogo.

"Ni kü career agi temulung asür aser tesasa kecha mali. Ni takok aser tamakok ajak agizüker, kechiyong iba ajanga ni tanü kechi jenjang nung ali aji tongtetdaktüsügo," ta Lallana-i shisem.

"Club aser lokti tentet ajak staff tem, manager aser caoch tem, kü teammate tem aser fan tem ajak dang kanga pelar.

"Ajak dang alia kü team, ozü kibong, kü kinungtsü Emily, ozü jabasotem, kütsü, kübu aser kü adinu ajak dang kü nem teyari agütsüba atema pelar," ta pai ashi.

Umpire telemtetba magizükba atema Pant nem demerit point agütsü



nguogo.

Umpire temi ball gauge ajanga ball asadanga sülen ball melenshitsü atema memulungba sülen Pant tezüdanga tena jakdang ball ya ali nung mereptoka liasü.

Pant-i pai aibelenba nangzüko aser match referee Richie Richardson-i temerenshi agütsüba agizüker asünung ken o angadangtsü nüngdak madoktsü.

ICC sangdong ka ajanga ashiba agi, "Pant indang disciplinary record nung demerit point ka bendenlokogo, koba pa atema ita 24 tsüingda mezüingbuba liasü."

Küm ana tsüingda asayar ka indang demerit points pezü mesüra iba dak tema jungdir point tem ya suspension points akümer aser asayar ka nem tenokdanga agütsür.

Suspension points ana ngura Test ka mesüra ODI ana mesüra T20I ana atema tenokdanga agütsütsü.

Leeds nung mezüingbuba Test asaya nung left-hander Pant-i tongtibang shilem agia pai innings anaprongla nung century kaka yangluogo.

BILEMDANGANG

"Anogoshia langka tasen angazüktsü merangang."